

Uunga siunnersuut: Inissianik attartortitsisarneq pillugu Inatsisartut peqqussutaata allangortinneqarnissaa pillugu Inatsisartut inatsisaat nr. xx, xx. xxx 2019-imeersoq

(Pisortat inissiaataanni uumasuuteqarnissamut tunngatillugu maleruagassat allangortinneqarnerat aamma attartortup toqukkut qimagunnerani il.il. attartukkap tiguneqartarnera pillugu)
(Ineqarnermut Attaveqarnermullu Naalakkersuisoq)

pillugu

Sanaartornermut Ataatsimiititaliap

siunnersuutip aappassaaneerneqarneranut

ISUMALIUTISSIISUTAA

Ataatsimiititaliap suliarinninnermini kingullermik ilaasortarai:

Inatsisartunut ilaasortaq Anders Olsen, Siumut, siulittaasoq
Inatsisartunut ilaasortaq Aqqaluaq B. Egede, Inuit Ataqtigiit, siulittaasup tullia
Inatsisartunut ilaasortaq Nikkulaat Jeremiassen, Siumut
Inatsisartunut ilaasortaq Justus Hansen, Demokraatit
Inatsisartunut ilaasortaq Pele Broberg, Partii Naleraq

Ulloq 25. september 2019-imi siullermeerinninnerup kingorna ataatsimiititaliap siunnersuut misissorpaa.

1. Siunnersuutip imarisaa siunertaalu

UKA 2018/108-p akuerineqarneratigut inissianik attartortittakkani pisortanit pigineqartuni qimmeqartoqarsinnaalerlunilu qitsuuteqartoqarsinnaalerpoq. Najugaqatigiiffiup siulersuisui najugaqatigiiffimmini qimmeqartoqarnissaanik qitsuuteqartoqarnissaanillu kissaateqanngitsut najugaqatigiiffimmi pineqartumi uumasuuteqartoqannginnissaanik aalajangiinissamut siunnersuut una aqputigalugu piginnaatinneqarput.

UPA 2019/120-ip nassatarisaanik siunnersuummi matumani siunnersuutigineqarpoq attartortup toqukkut qimagunnerani imaluunniit utoqqaat illuannut nuunnerani inoqutaasup inissaarunnissaa pinngitsoortinniarlugu inoqutaasut allat (attartortup qaniginerpaasai)

attartortumik qaammatit arfinillit najugaqateqareersimagunik inissiamik attartortittakkamik tiguisinnaapput.

2. Siunnersuutip Inatsisartunit siullermeerneqarnera

Uumasuuteqarneq:

Sapigaqartunut sapigaqarneq peqqissutsikkut iluaalliornermik nassataqarsinnaammat najugaqartut ilaat uumasunik sapigaqarpata pisortat inissiaataanni uumasuuteqarneq (qimmeqarneq qitsuuteqarnerlu) inerteqqutaassasoq Inatsisartunit isumaqatigineqarluarpoq. Attartortut sapigaqarneq pissutigalugu inissiami attartukkaminni najugaqarnermikkut napparsimalernissaat pinngitsoortinniarlugu uumasuut najugaqarfimmi kissaatigineqanngippata uumasuuteqarnissap inerteqqutiginnissaanut najugaqarfiup siulersuisi siunnersuutikkut matumuuna piginnaatinneqarput.

Inissiamik attartukkamik tigusineq:

Siullermeerinninnermi amerlanerussuteqarluartunit kissaatitut saqqummiunneqarpoq attartortup toqkkut qimagunnerani qatanngutaasut attartukkamik tiguisinnaatitaassasut imaluunniit sulisorisanut inissiap nalinginnaasumik attartuganngortinnissaanik innersuunneqarsinnaatitaassasut. Piginnaatitsissut tamanna attartortup utoqqaat iluannut nuunnerani aamma atuutsinneqassasoq kissaatigineqarpoq. Inissaaleqinerujussuaq pissutigalugu qatanngutigiit najugaqatigiittariaqarnerat nalinginnaavoq. Taamaattumillu toqkkut qimaguttoqarnerani qatanngutaasut inissaarutsinneqarnissaat pinngitsoortinniarneqassasoq nalinginnaasumik kissaatigineqarpoq.

3. Tusarniaanermut akissutit

Siunnersuut 29. marts 2019-imit 3. maj 2019-imut tusarniaassutigineqarpoq aammalu piffissami 28. maj 2019-imit 4. juni 2019-imut tusarniaassutigineqaaqqilluni. Sapaatip akunnerata missaannaanik tusarniaaneq tusarniaaffigineqartut ilaasa inatsisissatut siunnersuummut peqqissaartumik akissuteqarnissaannut sivikippallaartoq Sanaartornermut Ataatsimiititaliamit eqqumaffigineqarpoq. Piffissap tusarniaaffiusup sivikinnera IMAK-imit aamma Kommune Kujallermit uparuarneqarpoq.

Tusarniaanermut akissutit inatsisissatut siunnersuummut ilanngunneqarput, tamannalu ilusiliinissamut Inatsisartut Siulittaasoqarfiata piumasaqaataanut naapertuuppoq. Paasissutissat ataatsimiititaliamit tusaatissatut tiguneqarput.

4. Ataatsimiititaliap siunnersuummik suliarinninnera

Attartortup toqkkut qimagunneratigut imaluunniit utoqqaat illuannut nuunneratigut qatanngutit inissiami kiserngoruttut inissaarunnissaat pinngitsoortinniarneqartariaqartoq ataatsimiititaliamit isumaqatigineqarpoq.

Ataatsimiititaliap Naalakkersuisunut kaammattuutigaa inatsimmi atuuttumi § 60 imm. 1-ip oqaasertalerneqarnera attatiinnarneqassasoq taamaattorli ”sivikinnerpaamik ukiuni marlunni attartortup ataatsimut inoqutaannut peqataasimasoq” ima allanngortinneqassaaq ”sivikinnerpaamik qaammatini arfinilinni attartortup ataatsimut inoqutaannut peqataasimasoq.”

Taamaaliornikkut kikkut tamarmik – tamatumani qatanngutit, ernuttat, allallu inoqutigiinnut ilaasimasut ilanngunneqarput.

Nangillugu ataatsimiititaliap kaammattuutigaa, § 60 imm. 2 siunnersuummi allanngortinneqassasoq taamaalillutik meeqqat qatanngutillu aamma ilanngutsinneqarlutik.

5. Siunnersuutip aningaasaqarnikkut kingunerisassai

Siunnersuutip aningaasaqarnikkut allaffissornikkullu kingunerisassai pillugit siunnersuuteqartup naatsorsuutigisaanut Sanaartornermut Ataatsimiititaliap oqaaseqaatissaqanngilaq.

6. Ataatsimiititaliap inassuteqaatai

Ataatsimiititaliap kaammattuutigisai naapertorlugit Naalakkersuisut pingajussaaneerinninissaq sioqqullugu allannguutissatut siunnersuummik saqqummiussinissaat naatsorsuutigalugu inatsisissatut siunnersuut akuerineqassasoq ataatsimiititaliamit isumaqatigiittumit inassutigineqarpoq.

Taama oqaaseqarluni isumaliutissiissummilu allassimasunik oqaaseqaateqarluni ataatsimiititaliap siunnersuut aappassaaniigassanngortippaa.

Anders Olsen
Siulittaasoq

Aqqaluaq B. Egede
Siulittaasup tullia

Nikkulaat Jeremiassen

Justus Hansen

Pele Broberg